


Per svegliar il plaschair per la lingua

Nov program da la LR per famiglias ed uffants

■ **(anr/fa) Rumantschas e Rumantschs duessan duvra lur lingua cun plaschair e la dar vinavant a lur uffants. Cun gieus, cudeschs e barats tranter classas vul la Lia Rumantscha sustegnair geniturs e magistraglia.** «Causa ch' ils meds che la LR ha a disposiziun per promover la lingua rumantscha èn limitads èsi da tschertgar bain ils chomps d'acziun che fan il pli grond effect», ha ditg il secretari general *Urs Cadruvi* ier a chaschun da la conferenza da pressa a Cuira en la biblioteca interculturala «Vossa lingua». Ins haja badà ch'i manchian las purschidas per ils uffants pitschens, da la naschientscha fin tar la vegliadetgna da la scola primara, ha'l cuntinuà. Uschia è naschì il project da stgaffir da quests meds. *Martin Mathieut* che maina tar la LR la partiziun furmazion ha quintà co che quels meds per l'import da bundant 400 000 francs èn vegnids stgaffids.

Accompagnond l'instrucziun da rumantsch a Bravuogn

La strategia da la LR era sco ch'el ha ditg da metter l'accent sin il plaschair e main sin la grammatica: «Per la didactica rumantscha ston ins enchaminar ina nova via ed instruir il rumantsch da maniera ludica.» Causa memia paucs uffants ha la scola da Bravuogn stuì fusiunar cun la scola da Filisur, ina scola tudestga: «Cun plaschair avain nus pudì constatar ch'era uffants da Filisur frequentan l'instrucziun rumantscha», ha ditg Mathieut. La manadra da projects da la LR *Annalisa Schaniel* ha accompagnà durant in onn l'instrucziun da rumantsch a Bravuogn. Il material d'instrucziun ha mess a disposiziun la



Martin Mathieut cun in dals «Tgaubrochels» gist cumparids.

FOTO F. ANDRY

LR. Durant quel onn han ins creà il «giu da gaud».

En tut ils idioms e rumantsch grischun

«I sa tracta d'in giu da savida cun 3020 cartinas ch'ins po giugar en differentas variantas tant en famiglia sco er en scola primara», ha infurmà Annalisa Schaniel. Illustrà il giu ha *Annalis Vieli* da Razén, la producziun en lain ha fatg l'Argo a Cuira ed a Casti. Il giu custa 80 francs ed exi-

sta en tut ils idioms rumantschs ed en rg. Ulteriurs gieus davart ils pli differentes temas suondan ils proxims onns. In ulteriur product da la LR è l'emna da curs da rumantsch per famiglias da la diaspora. Quella ha già lieu quest onn per la segunda giada la fin da fanadur a Vignogn. Diesch famiglias cun 24 uffants han pudì sa divertir cun leziuns da rumantsch, istorgias, excursiuns e musica. «Sco ch'ils geniturs han ditg han profità lur uffants fitg da quest'emna e cumenzà a discurrer

cun plaschair rumantsch», ha ditg Annalisa Schaniel, «e quai era cun ils participants che discurrivan auters idioms.»

«Gieus senza cunfins» en il chantun triling

L'onn 2009 avevan ins realisà en Grischun il project Museum&Scola che cunteneva tranter auter era barats da classas. Causa il grond success ha decis la LR da cuntinuar cun tals projects: Il matg 2011 vegnan classas dal Grischun

tudestg, talian e rumantsch a sa scuntrar a Glion per in di cun «gieus senza cunfin». «Betg mo il sport ed ils gieus vegnan ad esser ina sfida per ils uffants, mabain era da sa far chapir en las trais linguas chantunales», ha ditg la collavuratura da la LR. Il project è vegnì lantschà en collavuraziun cun la Scola auta da pedagogia a Cuira, cun la Pro Grigioni Italiano e la Valservereinigung Graubünden sco era cun l'Institut per la pescuraziun da la cultura grischuna.

«Tgaubrochels» ed autras ediziuns rumantschas

«La LR sa sfadia da metter a disposiziun ad uffants e juvenils in program da lectura attractiv e multifar», ha menziunà *Andreas Gabriel*, il manader da la partiziun Art e Cultura LR, «per ch'els hajan lectura er en lur lingua materna.» Il program da cudeschs cumpiglia cudeschs da maletgs per ils pitschens fin titels tematics actuals per il stgalim aut e la scola media. Il cudeschet novcumparì «Tgaubrochels» ha l'intent da promover l'educaziun linguistica d'uffants da la prescolina. «Quels duain emperder ad enconuscher versets e chanzunettas da lur regiun rumantscha, poesias tradiziunales e novas che han da far cun il mund da l'uffant en quella vegliadetgna», ha declarà Annalisa Schaniel, «il cudeschet dat la pussaivladad da giugar cun la lingua rumantscha e da svegliar uschia il plaschair er als pli pitschens.» La versiun sursilvana cumpara il november, las autras versiuns idiomaticas suondan durant il proxim onn. «Causa che quels versins e hoppaheias vegnan mo discurreids e betg scrits na datti nagina versiun en rumantsch grischun.»